

МЕСЯЦА НОЕМВРИЯ В 9-Й ДЕНЬ.

**ПРАЗДНЕСТВО ПРЕСВЯТЫХ ВЛАДЫЧИЦЕ НАШЕЙ БОГОРОДИЦЕ РАДИ АФОНСКИХ
ЧУДОТВОРНЫХ ЕЯ ИКОНЫ, НАРИЦАЕМЫХ СКОРОПОСЛУШНИЦА**

НА ВЕЧЕРНИ

Блажен муж: 1-й антифон. На Господи, воззвах: стихиры, глас 1:

Днесь любовию празднующе Богородице, * честному образу Ея поклонимся * и тепле возопиим: * Матернее дерзновение к Сыну Твоему и Богу, Дево, имущи, * испроси нам у Него прощение грехов, * мир и велию милость. [Дважды.]

Храм Божества сущая, * вместилище пространное благодати и милосердия * явилася еси, Богоневесто. * Услыши убо скоро рабов Твоих, Всеблагая Скоропослушнице, * и подаждь скорбящим утешение, * бедствующим от бед избавление, * болящим здравие * и всем верным велию милость.

Призри с Небесе, Богородице, * на предстоящая пред святою иконою Твоею * и Тебе с верою призывающия * и благодать Твою ниспосли нам, * да богоугодно поприще жизни наша преидем * и да сподобимся Твоим ходатайством * от Сына Твоего прияти велию милость.

Ины стихиры, глас 4:

Веселися, Дохиарская обитель Архангелов, * радуйтесь, сущии во Афоне и повсюду, вернии: * общая бо всех Заступница * восхоте быти скорая молящихся Услышательница * великия ради Своея милости. [Дважды.]

Притекше под кров крил Небесных воинств Архистратигов, * притецем и под кров Небесе и земли Владычицы, * благоутробно бо приемлет и скоро внемлет прощением, * яко Всеблагая Скоропослушница, * к образу Ея со благоговением прибегающих * великия ради Своея милости.

Богоизбранная Дево Всецарице, * иноков неоторимый покрове * и всех христиан непостыдное прибежище, * храни жребий Твой, * Россию и вся грады, * веси и обители православныя * невредимы от враг видимых и невидимых, * и всех нас заступи * и спаси великия ради Твоея милости.

Слава, и ныне, глас 7:

Егда трапезарь Дохиарский Нил лишился зрения * за еже не вняти гласу Твоему, Пречистая, * и принесе Тебе покаяние пред святою иконою Твоею, * благоволила еси рещи ему: * о иноче, услышася моление твое ко Мне, * буди прощен и зряй, яко и прежде, * возвести же и прочим подвизающимся отцем и собратиям твоим, * яко аз есмь Мать Бога Слова * и священныя обители Архангелов по Бозе покров, * и помощь, и державное предстательство, * промышляющая о ней, яко Взбранная Правительница. * И впредь иноцы да прибегают ко Мне во всякой их нужде, * и скоро имам слушати их * и всех, со благоговением прибегающих ко Мне православных христиан, * се бо Скоропослушница нарицаюся.

Вход. Прокимен дне. И чтения.

Бытия чтение (глава 28):

Изыде Иаков от студенца клятвеннаго, и иде в Харрань. И обрете место, и спа тамо, зайде бо солнце, и взят от камня места того, и положи возглавие себе, и спа на месте оном; и сон виде: и се лествица утверждена на земли, еяже глава досязаше до небес, и Ангели Божии восходяду и нисходяду по ней. Господь же

утверждаешься на ней, и рече: Аз Бог Авраамов отца твоего, и Бог Исааков, не бойся, земля, идеже ты спиши на ней, тебе дам ю, и семени твоему. И будет семя твое, яко песок земный, и распространится на море, и ливу, и север, и на востоки. И возблагодарятся о тебе вся колена земная, и о семени твоем. И се Аз с тобою, сохраняяй ты на всяком пути, аможе аще пойдеш. И возвращу ты в землю сию, яко не имам тебе оставити, дондеже сотворити Ми вся, елика глаголах тебе. И воста Иаков от сна своего и рече: яко есть Господь на месте сем, аз же не ведех. И убояся, и рече: яко страшно место сие, несть сие, но дом Божий, и сия врата небесная.

Пророчества Иезекиилева чтение: (главы 43 и 44):

Тако глаголет Господь: будет от дне осмаго и прочее, сотворят иереи на олтари всесожжения вашего, и яже спасения вашего, и прииму вы, глаголет Адонаи Господь. И обрати мя на путь врат святых внешних, зрящих на востоки, и сия бяху затворена. И рече Господь ко мне: врата сия затворена будут, и не отверзутся, и никтоже пройдет сквозе их: яко Господь Бог Израилев пройдет ими и будут затворена. Яко игумен сядет в них снести хлеб, по пути Еламских врат внидет, и по пути его изыдет. И введе мя по пути врат святых, сущих к северу, прямо храму, и видех, и се исполнь славы храм Господень.

Притчей чтение (глава 9):

Премудрость созда себе дом, и утверди столпов седмь. Закла своя жертвенная, и раствори в чаши своей вино, и угодова свою трапезу. Посла своя рабы, созывающии с высоким проповеданием на чашу, глаголющи: иже есть безумен, да уклонится ко мне, и требующим ума рече: приидите, ядите мой хлеб, и пейте вино, еже растворих вам. Оставьте безумие, и живи будете, и възыщите разума, да поживете, и исправите разум в ведении. Наказуяй злыя, примет себе безчестие, обличаяй же нечестиваго, опорочит себе, обличение бо нечестивому – раны ему. Не обличай злых, да не возненавидят тебе: обличай премудра, и возлюбит тя. Дажь премудрому вину, и премудрший будет: сказуй праведному, и приложит приимати. Начало премудрости – страх Господень, и совет святых – разум. Разумети бо закон – помысла есть благаго, сим бо образом многое поживеши время, и приложатся тебе лета живота.

Аще изволит настоятель пяти литию, на оной стихире:

Глас 1:

Собравшися днесь, братие, на молебное песнопение * пред образом Богоматере Скоропослушницы, * духовное торжество составим * и благодать независтную почерпем * от неистошимаго источника дарований. * Благая бо Матерь сущи Всеблагаго Бога нашего * Богоподобными сияет чудесы, * страсти и болезни исцеляет, * в мори и на суши спасает * с верою к Ней прибегающия.

Глас 2:

Яже всем удобь послушная в скорби * и в печали скоро помогающая * призывающим Тя от души неложно, * умилосердиться потщися, Владычице, * и заступи рабы Твоя, * избавляющии нас от бед молитвами Твоими.

Глас 3:

Богоизбранная Приснодево, * Божественных даров сокровище, * мира Предстательнице, * скорая молящихся Послушательнице, * не лиши нас щедрот Твоих * и прошения наша ускори исполнити * во спасение душ наших.

Слава, и ныне, глас 7:

Милостива, Благопробытна и Скоропослушна нам, Госпоже, явися, * призывающим Божественную Твою благодать * во всех, случающихся нам: * всю бо надежду душ наших возложим к Тебе, Благосердой, * и во всех уповаем на промысл Твой, * Ты и будущия нас славы, * и живота Божественнаго сподоби.

На стиховне стихиры, глас 5:

Приидите, вернии, * восхвалим Приснодеву Богородицу, * радуйся,— глаголюще,— кивоте пресвятый * и всесветлая скиния Царя царей, Христа, Бога нашего; * радуйся, Ангелов удивление и славо; * радуйся, земнородных похвало и веселие, * спасающая в мире души наша.

Стих: Помяну имя Твое * во всяком роде и роде.

Радуйся, Благословенная в женах, * прародительския клятвы разрешение * и о всем мире умилоствление; * радуйся, христиан теплое предстательство * и услышательнице скорая молящихся к Тебе с верою; * радуйся, покрове и спасение душ наших.

Стих: Слыши, Дщи, и виждь, * и приклони ухо Твое.

Радуйся, Госпоже всемилостивая, * живоносный источниче, * струи щедрот точащий верным; * радуйся, Афона твердое ограждение, * иноков наставнице и промышленности; * радуйся, всех помощи, * радости и спасение душ наших.

Слава, и ныне, глас 8:

О, многих Твоих чудес, Богоблагодатная, * соделанных образом Твоим, Скоропослушнице! * Всяк бо, притекший к Тебе с верою, * не отыде от лика Твоего тощ и не услышан: * слепии у святых Твоя иконы прозреша, * хромии, расслаблении и глусии исцелишася, * безчадия, плена, пружия, * треволения морскаго и иных бед и недугов * избавила еси призывающих Тя, * Матерь Всецедраго Бога нашего, * подающаго нам Тобою велию милость.

Тропарь, глас 4:

К Богородице притецем, сущии в бедах, * и ко святей иконе Ея ныне припадем, * с верою зовуще из глубины души: * скоро наше услыши моление, Дево, * яко Скоропослушница нарекшаяся. * Тебе бо раби Твои в нуждах * готовую Помощницу имамы.

НА УТРЕНИ

На Бог Господь: тропарь Богородицы, глас 4:

К Богородице притецем, сущии в бедах, * и ко святей иконе Ея ныне припадем, * с верою зовуще из глубины души: * скоро наше услыши моление, Дево, * яко Скоропослушница нарекшаяся. * Тебе бо раби Твои в нуждах * готовую Помощницу имамы. [Трижды]

По 1-й кафизме седален, глас 2:

Вчера воспе Святая Церковь собор Небесных Сил, * благих покровителей наших; * днесь поем песнь Тебе, Всепетой Богородице, мира державному покрову, * и прославляем радостно благодать Твою. * Со Безплотными убо молися во еже спастися нам.

Слава, и ныне, тойже.

По 2-й кафизме седален, глас 3:

Яко многосветлая луна, * показася в честней обители Архангелов святая икона Твоя, Дево Скоропослушнице: * светиши бо благодатию чудес в нощи бед сущим * и скорую помощь подаеши во спасение душ наших.

Слава, и ныне, тойже.

На полиелеи величание:

Величаем Тя, * Пресвятая Дево, * и чтим образ Твой святой, * имже точиши исцеления * всем, с верою притекающим.

Псалом избранный: Помяни, Господи, Давида:

По полиелеи седален, глас 8:

Благоговейно обстояще честный образ Матере Света, * молитвы Ей яко Всеблагой Скоропослушнице усердно принесем. * Сию бо Небо одушевленное человеколюбием Господь содела, * изливая Тою, яко дождь, дары Своя во спасение душ наших.

Слава, и ныне, тойже.

Степенна, 1-й антифон, 4-го гласа.

Прокимен, глас 4: Слыши, Дщи, и виждь, * и приклони ухо Твое.

Стих: Лицу Твоему помолятся богатии людстии.

Всякое дыхание:

Евангелие от Луки, зачало 4.

Во дни оны, воставши, Мариам, иде в горняя со тщанием, во град Иудов. И вниде в дом Захариин, и целова Елисавет. И бысть яко услыша Елисавет целование Мариино, възграся младенец во чреве ея, и исполнися Духа Свята Елисавет. И возопи гласом велиим, и рече: благословена Ты в женах, и благословен плод чрева Твоего. И откуда мне сие, да прииде Мати Господа моего ко мне? Се бо, яко бысть глас целования Твоего во ушию моею, възграся младенец радощами во чреве моем. И блаженна Веровавшая, яко будет совершение глаголанное Ей от Господа. И рече Мариам: величит душа Моя Господа, и возрадовася дух Мой о Бозе Спасе Моем. Яко призре на смирение Рабы Своея, се бо, отныне ублажат Мя вси роди. Яко сотвори Мне величие Сильный, и свято имя Его. Пребысть же Мариамъ с нею яко три месяцы, и возвратися в дом Свой.

По 50-м псалме стихира, глас 7:

Прощения исполни рабов Твоих, * Тебе, Пресвятая Дево, с верою призывающих. * От всякия скорби, недугов и озлобления всех нас свободи, * да благодарственно воспеваем Тя, * скорую молящихся Услышательницу, * подающую верным велию милость.

Канона два. Канон первый, творение преподобнаго Никодима Святогорца. Глас 8.

Песнь 1

Ирмос: Воду прошел, яко сушу, * и египетскаго зла избежав, * израильтянин вопиаше: * Избавителю и Богу нашему поим.

Чудес Твоих Божественных множество благохвалити предпринимая, * Тя молю, Дево, от сердца, Скоропослушнице, * благодать подаждь ми.

Кто не изумится Твоего образа чудесем, Дево? * От него бо служителю трапезы возгласила еси трижды, * Скоропослушница нарекшися.

Какое чудодеяние Твое изрещи возмогу, Отроковице? * Ты бо прежде непокорнаго инока безочна соделала еси * и паки сего устроила еси видяща.

Радуйся, священная обитель Дохиарская: * ты бо имаши всех Госпожу Предстательницу и покров, * якоже Сама Она ясно возвести.

Другий канон, глас 4.

Песнь 1

Ирмос: Отверзу уста моя:

Мати Присносущнаго Света и Отчия Премудрости, * умудри неразумие мое * и просвети мя на пение и молитву пред святою иконою Твоею, Скоропослушнице.

Обретши сокровище радуются, * темже и мы, имуще Тя, Всецарице, * милосердия сокровище Небесное и неизживаемое, * воспеваем, радуящися, Твоя чудеса.

Лицу Твоему,– предрече Давид,– помолятся богатии людстии; * исполняющуся сему, вкупе с богатыми и мы, добродетельми убозии, * молимся Тебе, Дево, пред ликом Твоим.

Якоже очи раб в руку господий своих, * тако очи наши устремлены суть к Тебе * и к образу Твоему, Всеблагая Владычице, * дондеже ущедриши рабы Твоя.

Катавасия: Отверзу уста моя, * и наполнятся Духа, * и слово отрыгну Царице Матери, * и явлюся, светло торжествуя, * и воспую, радуяся, Тоя чудеса.

Песнь 3

Ирмос: Небеснаго круга Верхотворче, Господи, * и Церкви Зиждителю, * Ты мене утверди в любви Твоей, * желаний краю, верных утверждение, * Едине Человеколюбче.

Безчадных благочадных Ты, Марие, показала еси * и неплодных жен соделала еси, Скоропослушнице, веселящихся о чадах. * Кто убо не изумится, Дево, величию Твоему?

Булгария проповедует Твоего образа чудеса, о Скоропослушнице, * восток же и запад. * Источник бо соделалася еси, * точащий благодати всем призывающим имя Твое.

Рака болезнь от руки исчезает честныя жены, Дево, посещением Твоим, * темже страждущая, от недуга свободившись, * радуясь, пропевае благодарственная.

Чудно украсися икона Твоя, Скоропослушнице, * и паче лучей солнечных освещает всех благодатию Твоею, Пречистая. * Кто убо не восхвалит Тя, на Небеси и на земли славимую!

Ин. Песнь 3

Ирмос: Твоя песнословцы:

Воззри Твоими очесы, Марие, * и виждь благоутробно пред иконою Твоею предстоящих и Тя с верою призывающих, * и услыши сих, Скоропослушнице.

Крепость даруй нам, Чистая, да творим волю Сына Твоего со страхом и любовию, * укрепляеши бо рабы Твоя яко Матерь Всесильнаго Бога нашего.

Страсъями боримии и невидимыми сеятелями зол, * присно нуждаемся в Твоей, Владычице, неборимой помощи, * еже не лиши нас, Богоблагодатная.

Спасительный щит подаждь нам, Госпоже, * Твое державное заступление, * имже началозлобнаго побеждающе коварства, * венцев славы сподобимся.

Катавасия: Твоя песнословцы, Богородице, * живой и независтный Источниче, * лик себе совокупльшия, духовно утверди, * в Божественней Твоей славе * венцев славы сподоби.

По 3-й песни седален:

Владычицу Тя мира вемы, Марие Всепетая, * яко родила еси нам всех Творца, Спасителя мира, * Иже и прослави Тебе, Пречистую Матерь Свою, * подая Тобою благодать и милость чтущим Тя * и молящимся Тебе, Богородице.

Слава, и ныне, тойже.

Песнь 4

Ирмос: Услышах, Господи, * смотрения Твоего таинство, * разумех дела Твоя * и прославих Твое Божество.

Во всех концах чудотворный Твой образ прославися, * и ныне вси устами Скоропослушницу произносят.

И во сне, Всецарице, и яве, Скоропослушнице, являея, * чудеса совершаеши в мире преславная.

Кто Твое, Дево, имя в нужде всякой призываше, * и скоро того не услышала еси, яко Скоропослушница сущая?

Блаженна еси Дохиарская обитель славная, * иконою бо обогатилася еси Скоропослушницы всечестною.

Ин. Песнь 4

Ирмос: Седяй в славе:

Припадая ко святей иконе Твоей, Дево, * вопию Ти от сердца сокрушенна: * не попусти ми погибнути, Всемилостивая Госпоже, * житие мое во гресех иждившему.

Грехолюбив сый, удалихся, Владычице, Сына Твоего, * и лишен есмь дерзновения к Нему. * Темже к покаянию мя направив, * сподоби получитьи, еже погубих.

Богоизбранная Отроковице, в руне орошенном предвиденная, * окропи рососою благодати изсохшую землю сердца моего * и благоплодну соделай душу мою.

Радуйся, Богоневесто, добродетельми, яко рясны златыми, преукрашенная; * радуйся, сосуде мира, имже врачуются зовущии: * слава, Христе, силе Твоей.

Катавасия: Седяй в славе на Престоле Божества * во облаце легце, * прииде Иисус Пребожественный * нетленною дланию и спасе зовущия: * слава, Христе, силе Твоей.

Песнь 5

Ирмос: Просвети нас повелении Твоими, Господи, * и мышцею Твоею высокою * Твой мир подаждь нам, Человеколюбче.

Како на Твой пречистый образ * аз, недостойный, воззрю, Скоропослушнице, * нечистыми очесы моими!

Море и земля, Всецарице, * Твоя иконы чудеса проповедуют: * Твоих бо благодатей сия обоя насладишася.

Татя являеши, пенязи похитивша ближняго, Матеродево, * и возвращаеши праведно сия имущему.

Что воздадим Тебе, Всеблагая, за благодать многую, * юже явила еси нам, * даровав икону Твою, богатство священное.

Ин. Песнь 5

Ирмос: Ужасошася всяческая:

Несть, Всемилостивая Госпоже, такового, * иже бы лишился щедрот Твоих, прибег с верою к Твоему благоутробно. * Темже прилежно молим Тя: * сподоби и нас грешных милости Твоя.

Умилостивление о всем мире суцая, * умоли, Дево, Сына Твоего, всех Судию, * да не помянет грехов наших, * и да избавимся Тобою всякаго прещения Его, * находящаго на люди согрешившия.

Примирителя всяческих рождаша, * всемоцным предстательством Твоим, Владычице, умиротвори нас к Нему, * к ближним и к себе самим, яко воспевающим Тя мир подавающая.

Катавасия: Ужасошася всяческая * о Божественней славе Твоей: * Ты бо, Неискусобрачная Дево, * имела еси во утробе над всеми Бога * и родила еси Безлетнаго Сына, * всем воспевающим Тя * мир подавающая.

Песнь 6

Ирмос: Молитву пролию ко Господу * и Тому возвещу печали моя, * яко зол душа моя исполнися * и живот мой аду приближися, * и молюся, яко Иона: * от тли, Боже, возведи мя.

Яко любвеобильная Матерь явльшися, призывала еси отрока к Себе, * дондеже избавила еси от руки разбойников, Матеродево. * Но да обретем Тя и мы, Матерь любвеобильную!

Не имамы раби Твои иного, разве Тебе, предстательства и покрова. * Темже, Чистая, от сердца вопием: * всякия беды свободи стадо Твое * и верных, к Тебе прибегающих.

Якоже спасла еси от морския бури призвавших Божественное имя Твое, * тако и нас от чувственного крушения и мысленнаго, Дево, спаси * и в тихия пристанища спасения управи.

Мир Тя прибежище стяжа и спасение; * тем, Чистая, к честней Твоей иконе отсюда притекают людие, * и вси скоро их слушающую обретают Тя.

Ин. Песнь 6

Ирмос: Божественное сие и всечестное:

Ты – рабов Твоих утешение, Всеблаженная, * Ты – свет, удобрение и надежда спасения; * Ты убо промыслиением Твоим всякия нужды и скорби избави нас.

Ведущи немощи наша, Богородительнице, * восполний духовную и вещественную скудость нашу, * да подающего нам Тобою вся благая Бога славим.

Не остави нас, Всещедрая, вегда оскудевати крепости нашей, * не отступи от уповающих на Тя во исходе * и по исходе яви нам благости Твоя силу.

Преблагословенная Марие, книга Божия запечатленная, * в книзе живота вечнаго написатися нам сподоби, * да от Тебе рождагося Бога славим.

Катавасия: Божественное сие и всечестное * совершающе празднество, * Богомудрии, Богоматере, * приидите, руками восплецим: * от Нея рождагося Бога славим.

Кондак, глас 8:

В мори житейстем обуреваемии, * треволнению подпадаем страстей и искушений. * Подаждь убо нам, Госпоже, руку помощи, якоже Петрови Сын Твой, * и ускори от бед избавити ны, да зовем Ти: * радуйся, Всеблагая Скоропослушнице.

Икос: Идеже осенит благодать Твоя, Владычице, * тамо недужнии здрави бывають, бедствующие во благополучие приходят, * и всяк скорбящий радости исполняется. * Темже благодатию Твоею осени и нас, сицевая радостная Тебе глаголющих: * радуйся, Богоблагодатная, Неприступнаго Божества селение; * радуйся, святая трапезо, хлебом жизни нас снабдевающая; * радуйся, миро многоценное, облагоухающее верных; * радуйся, маслино, елеем милосердия нас умащающая; * радуйся, неистоимое сокровище даров; * радуйся, приснотекущий источниче чудес; * радуйся, обидимых заступление; * радуйся, обуреваемых благоутишное пристанище; * радуйся, глухих слышание и свете слепых; * радуйся, расслабленных укрепление; * радуйся, освобождение плененных; * радуйся, мира всего упование; * радуйся, Всеблагая Скоропослушнице.

Песнь 7

Ирмос: От Иудей дошедше, отроцы * в Вавилоне иногда * верою Тройческою пламень пещный попраша, поюще: * отцев Боже, благословен еси.

Слепым даровала еси действие очесем, Дево, еже видети, * но и наша зеницы души и телесе просвети, * да поем присно величия Твоя.

Глухим слышание даровала еси, Марие Скоропослушнице, * но и нас всех отверзи ушеса души и телесе, * яко да поем присно величия Твоя.

Якоже древле от пругов избавила еси прибегших к Тебе, Пречистая, * тако и нас от сих и всякаго вреда избави, * да поем присно величия Твоя.

Яко исправила еси прежде разслабленнаго, * тако и нас, по обою разслабленных, теплым Твоим предстательством исправи, * да поем присно величия Твоя.

Ин. Песнь 7

Ирмос: Не послужиша твари Богомудрии:

Наставнице ко спасению рабов Твоих, * души тричастное, Госпоже, исправи, * да благодати безстрастия сподобьшися, поем: * препетый отцев Господь и Бог, благословен еси.

Желательную силу души к Божественному рачению направи, * да тою Бога всецело возлюбим * и к Нему присно стремимся, * яко всеблаженному желаний краю.

Яростную силу души * помози нам, Дево, обрати на невидимыя враги спасения нашего * и спасительныя любви исполни сердца наша к ближним и к Богу.

Словесное души к Богоугодному созерцанию воскрыли, Владычице, * богопротивных помышлений избавляющи, * и всех нас благое мыслити, глаголати и творити укрепи.

Катавасия: Не послужиша твари Богомудрии * паче Создавшаго, * но огненное прещение мужески поправше, * радовахуся, поюще: * препетый отцев Господь и Бог, благословен еси.

Песнь 8

Ирмос: Царя Небеснаго, * Егоже поют вои Ангельстии, * хвалите и превозносите во вся веки.

От всяких болезней, Скоропослушнице, нас избави, * якоже от сих многих избавила еси.

Икона Твоя, Дево, показася источник чудес, * от негоже жаждущии снабдеваются изобильно.

Погибшаго Ты являеши, Госпоже, * и подаеши радость обретшим. * Коль многая есть образа Твоего благодать!

Повелению Твоему, Владычице, повинуются вся стихии, * от нихже вреда да избавляеши Тя призывающих.

Ин. Песнь 8

Ирмос: Отроки благочестивыя:

Пажить плодоносну обретае стадо под Твоим, Богомати, управлением, * и душетлении волцы не мощны расхитити словесных овец, * хранимых благодатию Сына Твоего и Бога.

Блажен человек, емуже есть заступление его от Тебе, Богоневесто, * присно бо полагает таковой восхождения в сердце своем, * дондеже узрит себе спасенна и восплет: * Господа пойте дела и превозносите Его во вся веки.

Седмисвещный светильниче, седмию дарами Духа светящий, * сподоби и нам украситися духовными плодами, * да, ущедреннии чрез Тебе Богом, поем: * Господа пойте дела и превозносите Его во вся веки.

Горо Божия, в Нейже благоволи жити Бог, * молися к Нему о нас, * да помощию Его благое творяще, * сподобимся узрети премирныя горы и тамо пети: * Господа пойте дела и превозносите Его во вся веки.

Катавасия: Отроки благочестивыя в печи * Рождество Богородичо спасло есть, * тогда убо образуемое, * ныне же действуемое, * вселенную всю воздвизает пети Тебе: * Господа пойте дела * и превозносите Его во вся веки.

Песнь 9

Ирмос: Воистинну Богородицу Тя исповедуем, * спасеннии Тобою, Дево Чистая, * с Безплотными лики Тя величающе.

Соберитесь усердно в обитель Божественную Архангелов, болящии: * Врач бо в ней пребывает безмездный.

Священная икона Твоя другая показася Силоамская купель, Дево, * очищающая и целящая болезни души и телесе.

Воспламеняет мя рачение зрети Твоего образа благодатную лепоту, * и насыщения не имам величати Тя!

Да увижду Тя, Всеблагая Скоропослушнице, во время смерти утешающую мя * и зраки демонов отгоняющую!

Ин. Песнь 9

Ирмос: Всяк земнородный:

Помяни, Госпоже, рабы Твоя, любовию славящия Тя, * услыши молящихся к Тебе * и молитвами Твоими благоуветлива нам соделай Сына Твоего и Бога * zde и на Страшном Суде Его, * Всеблаженная Богородице, Чистая Приснодево.

Радосте Ангелов и человеков, свободны нас печалей житейских сотвори * и ходатайством Твоим не кончаемых мук избави, * да временных и вечных бед Тобою избывше, воишем: * радуйся, Всеблаженная Богородице, Чистая Приснодево.

Видимо пред образом Твоим предстояще, * невидимо же к Тебе, одесную Сына Твоего стоящей, * ум возводяще, молим Ти ся прилежно: * сподобитися нам райскаго блаженства умоли, * Всеблаженная Богородице, Чистая Приснодево.

Благаго Царя Благая Мати, * осени ны необоримым покровом Твоим, * Всеблаженная Богородице, Чистая Приснодево.

Катавасия: Всяк земнородный * да възиграется, Духом просвещаемь, * да торжествует же Безплотных умов естество, * почитающее священное торжество Богоматере, * и да вопиет: * радуйся, Всеблаженная * Богородице, Чистая Приснодево.

Светилен:

Зрящии Тя ныне на иконе с Предвечным Младенцем, * просим Тебе, Богоневесто: * не лиши нас и в будущем веце всеблаженнаго лицезрения Твоего * и воплотившагося от Тебе Сына Божия, * да со благоугодившими Ему Имя Его и Твое величаем.

На хвалитех стихирь, глас 5:

Дивна дела Твои, Господи! * Пресвятую Матерь Твою даровал еси * беспомощным скорую Помощницу, * сильную Защитницу беззащитным * и предстательство теплое безответным: * предстоя бо Тебе, всех Владыце, * молится присно о всех нас. [Дважды.]

Кое достойное благодарение * принесем Ти, Богоизбранная Приснодево? * За множество даров Твоего милосердия, * являемого с верою к Тебе прибегающим, * недуги бо душ и телес врачуеши * и избавляеши от бед, * молящихся Богу присно о всех нас.

Державная Владычице мира, * назирающая сущих в Горе Твоей и повсюду верных * яко Взбранная Правительница, * не престай благоутробно промысли о рабех Твоих * и вся благая нам ниспосылати, * временная же и вечная, * и молися Богу присно о всех нас.

Слава, и ныне, глас 3:

Светел прешедший праздник, * озаренный славою Архистратигов, * радостен днешний, светися благодатию Ангелом говейнаго образа Богоматере * и на руках Ея держамаго Вседержителя. * Якоже бо Он рече нам: * просите, и дастся вам, – * тако и Всеблагая Матерь Его * повеле прибегати к Ней во всякой нужде * и обеща скоро слушати * со благоговением молящихся пред святою Ея иконою, * юже и прослави чудесы многими, * подаючи верным велию милость.

Славословие великое и отпуст.

НА ЛИТУРГИИ

Блаженны перваго канона, песнь 3-я, и втораго, песнь 6-я.

Безчадных благочадных Ты, Марие, показала еси * и неплодных жен соделала еси, Скоропослушнице, веселящихся о чадах. * Кто убо не изумится, Дево, величию Твоему?

Булгария проповедует Твоего образа чудеса, о Скоропослушнице, * восток же и запад. * Источник бо соделалася еси, * точащий благодати всем призывающим имя Твое.

Рака болезнь от руки исчезает честныя жены, Дево, посещением Твоим, * темже страждущая, от недуга свободившись, * радующихся, пропевае благодарственная.

Чудно украсися икона Твоя, Скоропослушнице, * и паче лучей солнечных освещает всех благодатию Твоею, Пречистая. * Кто убо не восхвалит Тя, на Небеси и на земли славимую!

Ты – рабов Твоих утешение, Всеблаженная, * Ты – свет, удобрение и надежда спасения; * Ты убо промыслиением Твоим всякия нужды и скорби избави нас.

Ведущи немощи наша, Богородительнице, * восполняй духовную и вещественную скудость нашу, * да подающего нам Тобою вся благая Бога славим.

Слава: Не остави нас, Всещедрая, вегда оскудевати крепости нашей, * не отступи от уповающих на Тя во исходе * и по исходе яви нам благодати Твоя силу.

И ныне: Препоблагословенная Марие, книга Божия запечатленная, * в книзе живота вечнаго написатися нам сподоби, * да от Тебе рождашася Бога славим.

Тропарь, глас 4:

К Богородице притецем, сущии в бедах, * и ко святей иконе Ея ныне припадем, * с верою зовуще из глубины души: * скоро наше услыши моление, Дево, * яко Скоропослушница нарекаяся. * Тебе бо раби Твои в нуждах * готовую Помощницу имамы.

Кондак, глас 8:

В мори житейстем обуреваемии, * треволнению подпадаем страстей и искушений. * Подаждь убо нам, Госпоже, руку помощи, якоже Петрови Сын Твой, * и ускори от бед избавити ны, да зовем Ти: * радуйся, Всеблагая Скоропослушнице.

Прокимен, глас 3, песнь Богородицы:

Прокимен: Величит душа Моя Господа, * и возрадовася дух Мой о Бозе Спасе Моем.

Стих: Яко призре на смирение рабы Своя, се бо отныне ублажат Мя вси роди.

Апостол ко евреем, зачало 240.

Братие, сие да мудрствуется в вас, еже и во Христе Иисусе, Иже во образе Божии сый, не восхищением непщева быти равен Богу. Но Себе умалил, зрак раба прим, в подобии человечестем быв, и образом обретеса якоже человек. Смирил Себе, послушлив быв даже до смерти, смерти же крестныя. Темже и Бог Его превознесе и дарова Ему имя, еже паче всякаго имене, да о имени Иисусове всяко колено поклонится небесных и земных и преисподних, и всяк язык исповесть, яко Господь Иисус Христос в славу Бога Отца.

Аллилуиа, глас 8: Слыши, Дщи, и виждь, и приклони ухо Твое.

Стих: Лицу Твоему помолятся богатии людстии.

Евангелие Луки, зачало 54.

Во время оно, вниде Иисус в весь некую, жена же некая именем Марфа прият Его в дом свой. И сестра ей бе нарицаемая Мария, яже и седши при ногу Иисусову, слышаше слово Его. Марфа же молвяше о мнозе службе, ставши же рече: Господи, не брежеш ли, яко сестра моя едину мя остави служити; рцы убо ей, да ми поможет. Отвещав же Иисус, рече ей: Марфо, Марфо, печешися и молвиши о мнозе. Едино же есть на потребу. Мария же благую часть избра, яже не отыметя от нея. Бысть же егда глаголаше сия, воздвигши некая жена глас от народа, рече Ему: блажено чрево носившее Тя, и сосца, яже еси ссал. Он же рече: темже убо блажени слышавшии слово Божие, и хранящи е.

Причастен: Чапу спасения прииму, и имя Господне призову.

ЧУДОТВОРНАЯ ИКОНА БОЖИЕЙ МАТЕРИ, ИМЕНУЕМАЯ СКОРОПОСЛУШНИЦА

Икона находится в Дохиарском монастыре на Святой Горе Афон. Святой образ был написан в X веке, во время жизни настоятеля обители преподобного Неофита.

Через много веков, в 1664 году, трапезарь Нил, проходя в ночное время с зажженной лучиной в трапезную, услышал голос от образа Богородицы, висевшего над дверью, призывавший его впредь не ходить там с зажженной лучиной и не коптить образ. Однако монах пренебрег этим предупреждением и продолжал ходить в трапезную с коптящей лучиной, за что был наказан слепотой.

День и ночь молился он перед образом Матери Божией, в раскаянии испрашивая себе прощения и исцеления. Милостивая Богородица услышала молитву покаявшегося инока и возвестила ему о прощении и возвращении зрения, повелев рассказать всей братии об этой милости: «С этой поры будет именоваться сия Моя икона Скоропослушницею, потому что скорую всем, притекающим ко Мне, буду оказывать милость и исполнение прошений».

Через эту святую икону «Скоропослушницы» Пресвятая Богородица и в последующие времена совершала многие исцеления: слепым даровала зрение, восставляла расслабленных. Особо отмечались случаи исцеления от падучей и беснования. Многих избавляла Богородица от кораблекрушения, освобождала из плена.

Пресвятая Мать Божия поныне исполняет Свое обещание – являет скорую помощь и утешение всем, прибегающим к Ней с верою.

На Руси списки с чудотворной Афонской иконы «Скоропослушница» всегда пользовалась большой любовью и почитанием. Многие из них прославились чудесами.